

die Sonne heis scheine Exod. 16. 1. Samuel. 11. mit ihrer hitze siehe  
Psal. 121. Sonn/Mond / Sternen/finster werden Eccles. 12. Das die  
Sonn verbrenne das man schwarz wird. Cantic. 1 das die Sternen  
am Himmel vnd Orion scheine vnd die Sonn gehe finster auff vnd der  
Mond tuncel scheine Esa. 13. das Sonn vnd Mond vnd Sternen  
scheinen/das der blis leuchtet/Baruch. 6: das die Sonn inn finsternis  
vnd der Mond inn blut (das ist blut rote farbe) verwandelt werde/ Jeel.  
2. das die Sonn truckne im Mittage die Erde / das sie heisser mache  
denn viel Ofen/ vnd brennet die Berge vnd blest eitel hitze von sich vnd  
gebe so hellen glanz von sich das die augen blendet vnd der Mond schei-  
ne zu seiner zeit vnd vnterscheide die Monat Syrach 43. das die Sonn  
ihren schein verlohren vnd ein finsternis vber das ganze Land worden/  
da Christus am Creus gehangen Luc. 23.

So man diesen vnd vielen der gleichen sprüchen glauben mus vnd  
nach dem Buchstaben verstehen/wie ihr nicht verneinen könnet / wa-  
rumb solten wir denn die heilige schrift lügen straffen/wenn sie inn so vie-  
len sprüchen den aufgang vnd vntergang der Sonnen vnd sternem be-  
zeuget / fürnemlich weil auch vnser Herr Christus der Allmechtige  
Schöpffer selber also redet vnd bezeuget.

Neben dem ist auch gewis das die heiligen Patriarchen Abraham/  
Isaac / Jacob / Joseph / 2c. die besten Astronomi gewesen / wie Jo-  
sephus zeuget lib. 1. cap. 16. vnd auch von Mose gesagt wird / das er  
inn aller weisheit der Egypter sey gelehrt gewesen / Actor: 7. vnd  
vom Könige Salomone zeuget das Buch der Weisheit / cap. 7. das  
er habe gehabt erkenntnis alles dinges / der zeit anfang / ende vnd mittel/  
wie das Jahr rumb laufft vnd auch gewust den silum stellarum wie die  
sternen stehen vnd dergleichen.

Von dem Propheten Daniel am 1. siehet auch geschrieben das er  
sey zehn mahl klüger vnd verstendiger gewesen den alle Sternseher vnd  
Weisen im ganken Reich.